

Tu'u 'Ali'aliaki 'i he Taimi 'o e Fakafepakí

Hē Mei he Mo'óni 'i Ketilani: Ko e Fie Ma'u ke Muimui Faivelenga he Kau Taki 'o e Siasí

ʻI he 1837, ne faingataʻaia fakapaʻanga e Kāingalotu ʻi Ketilani, ʻOhaioó. Ke tokoniʻi e Kāingalotú ke toe lelei ange honau tuʻunga fakapaʻangá, ne fokotuʻu ʻe Siosefa Sāmita mo e kau taki kehe ʻo e Siasí ha kautaha ne hangē pē ha pangikeé pea ui ia ko e Sōsai-eti Maluʻi ʻo Ketilani. Koeʻuhí ko e mafola ʻa e ngaahi palopalema fakaʻekonómiká he taimi ko ʻení, ne lahi ha ngaahi pangikē ʻi he ʻlunaiteti Siteití ne tāpuni. Ne tāpuni foki mo e Sōsaieti Maluʻi ʻo Ketilani ʻi he faʻahitaʻu fakatōlau ʻo e 1837. Naʻe meimei ke mole e meʻa kotoa ʻa e kau fakahū paʻanga ʻe toko uangeau he pangikeé, ka ko e mole lahi tahá ʻa Siosefa Sāmitá. Neongo naʻe ʻikai fakapaʻanga e Sosaieti Maluʻi ʻo Ketilani ʻe he Siasí, ka naʻe lau ia ʻe ha nīhi ʻo e Kāingalotú ko ha pangikē ʻa e Siasí pe ko e pangikē ʻa e Palōfitá pea naʻa nau tukuakī ʻa Siosefa Sāmita ki heʻenau ngaahi palopalema fakapaʻangá. Ne kamata ke ui ia ʻe ha nīhi ko ha palōfita hinga. Ka neongo e mole ʻa e pangikeé, ne tokolahí ha nīhi kehe ne mole ʻenau paʻangá ne kei hoko atu pē ʻenau tuí mo e tuʻumaʻu ʻi he Palōfitá.

Ne kamata ke mafola ʻi ha nīhi tokolahí ʻo e Kāingalotú e laumālie ʻo e hē mei he moʻóni mo e fefakaangaʻakí. ʻI Sune 1838, ne mavahe mei he Siasí ha kakai ʻe toko 200 pe 300 kuo hē mei he moʻóni, kau ai ha kau ʻAposetolo ʻe toko fá, kau Fakamoʻóni ʻe Toko Tolu ʻo e Tohi ʻa Molomoná, mo ha mēmipa ʻo e Kau Palesitenisi ʻUluakí. Neongo ia, ko e tokolahí ʻo e Kāingalotú ne nau tali ʻo hangē ko Pilikihami ʻlongí ʻaki ʻa e tui ʻi he vahaʻataimi ʻahíahi ko ʻení. Ne fakamālohia kinautolu ʻe he ʻEikí, pea tuʻumaʻu ʻi heʻenau fakamoʻóni. Ko e tokolahí ʻo kinautolu ne mavahe mei he Siasí he vahaʻataimi ko ʻení ʻo e hē mei he moʻóni ne nau foki kimui ʻo kole ke toe kau fakataha mo e Siasí ʻo e ʻEikí. Ne kau ʻi he nīhi ko ʻení ʻa ʻŌliva Kautele, Māteni Hālisi, Luke Sionisoni, mo Feletiliki G. Uiliamisi.

Ne feinga ha nīhi tokosií ʻo e kau hē mei he moʻóni ke fakapoongi ʻa Siosefa Sāmita lolotonga ʻo e ngaahi faigataʻa ko ʻení. Ne fakatokanga ki ai e Laumālie, peá ne mavahe mo Sitenei Likitoni he pō 12 ʻo Sānuali 1838. Ne muimuui kinaua ʻe hona ngaahi filí ʻi ha ngaahi ʻaho lahi, ka naʻe maluʻi kinaua ʻe he ʻEikí. Ne na tūʻuta mo hona fāmilí ki Hihifo Mamaʻo, ʻi Mīsuli he ʻaho 14 ʻo Māasi 1838.

Aleaí fakakulupu e ngaahi fehuí koʻeni:

- Ko e hā e tefitoí moʻóni te tau lava ʻo ako mei he meʻa ni fekau-ʻaki mo e founa ki hono tali ʻo e fakafepakí ʻi heʻetau moʻuí? Ko e hā e tefitoí moʻóni te tau lava ʻo ako mei he meʻa ni fekauʻaki mo e founa ke talí ʻaki e fakafepakí ki he Siasí?
- Ko e hā te tau lava ʻo fai ke kei faivelenga ai ki he kau taki ʻo e Siasí neongo ʻetau fanongo ki hono fakaangaí kinautolu ʻe he kakai kehé?
- Ko e hā e ngaahi founa kuo tāpuekina ai koe koeʻuhí kuó ke muimui ki he palōfitá?

Moveuveu ʻi he Fakatokelau ʻo Mīsuli: Ako ke Kātakiʻi Lelei e Fakafepakí

ʻI he 1837 mo e 1838, ne kamata ke fakaʻilo mo fakamamahí e Siasí mo hono kau taki ʻe ha nīhi ne mavahe pea tuʻusi mei he Siasí ʻa ia naʻa nau nofo fakataha pē mo e Kāingalotu ʻi Hihifo Mamaʻo. ʻI Sune ʻo e 1838, ne lea fefeka ai ʻa Sitenei Likitoni ʻo ʻiloa ia ko e ʻʻMalanga ʻo e Māsimá.ʻʻ Naʻá ne fakaʻaongaí e Mātu 5:13 ʻo pēhē kapau ʻe mole mei he māsimá hono koná, ta ʻoku taʻeʻaonga ia pea ʻoku totonu ke lí ia kituʻa, ʻo fakaʻuhingaí ko kinautolu kuo mavahe mei he Siasí ʻoku totonu ke fakamavaheí kinautolu mei he Kāingalotú. Hili ha uike ʻe ua mei ai ʻi he ʻaho 4 ʻo Siulai, ne fai ʻe Sitenei Likitoni ha lea ʻo palōmesi ai ʻe maluʻi ʻe he Kāingalotú kinautolu ʻo aʻu ki ha ʻʻtau ke fakaʻauha.ʻʻ Neongo ʻoku ngali fepakí e ongo lea ko ʻení mo e fakahinohino ʻa e ʻEikí ke ʻʻkole ke fakamelinóʻʻ (T&F 105:38), ka naʻe pulusi e ongo leá pea tupu ai ha hohaʻa lahi ʻa e kakai ne ʻikai ke kau ki he Siasí.

Lolotonga e taimi ko ʻení, ne hanga ʻe ha tokotaha papi ului ko Samisoni ʻĀvati ʻo fai ha fuakava fakapulipuli mo kinautolu ʻe kau mo ia ʻi hono fokotuʻu ha kautaha fakatupu moveuveu ne ui ko e kau Teinatí. Ne fakahinohinoí kinautolu ʻe ʻĀvati ke kaihaʻa mo fakaeaua e kakai ʻo Mīsuli, ʻo talaange ʻe tokoni ʻeni ki hono langa hake e puleʻanga ʻo e ʻŌtuá. Ne fakapapauí ange ʻe ʻĀvati ki hono kau muimui ne ʻomi ʻene fakahinohino mei he Kau Palesitenisi ʻUluakí. Ne toki ʻiloí e moʻóni kimui, pea tuʻusi leva ʻa ʻĀvati mei he siasí. Ne maumuauí lahi ʻe he ngaahi ngāue ʻa ʻĀvatí ʻa e ongoongo ʻo e Sísí pea ne kau ia he meʻa ne tokoni ki hono tukupōpula ʻo e Palōfitá ʻi he Fakapōpula Lipetií.

ʻI Okatopa 1838, ne hoko ai ha tau he vahaʻa ʻo ha kāingalotu ʻo e Siasí mo e kau tau ʻa Mīsuli ʻo mate ai ha kau tangata tokosií mei he ongo fahaí fakatouʻosi. Ne ʻave ha ngaahi fakamatata ne fakalahi ʻo e taú ki he Kōvana ko Lilipeni W. Pokí, ko e kōvana ia ʻo e siteiti ʻo Mīsuli, peá ne fai ai ha tuʻutuʻuni ke fakaʻauha: ʻʻKuo pau ke lau e kau Māmōngá ko e fili pea kuo pau ke fakaʻauha pe tuli mei he siteití, kapau ʻe ʻaonga ia ki he lelei ʻa e kakaiʻʻ (toʻo mei he *History of the Church*, 3:175). Ne vave hano ʻātakaií e kolo he Hihifo Mamaʻo ʻe ha kau tau ne nau tokolahí ange he kau tau ʻa e Kāingalotú ko e toko nima ki he taha. Ne tuku pōpula ʻa Siosefa Sāmita mo e kau taki kehe ʻo e Siasí ʻi he Fale Fakapōpula Lipetií, ʻo nau nofo ai he kotoa ʻo e faʻahitaʻu momokó. Ne fakamālohí e toenga ʻo e Kāingalotú ke nau mavahe mei he siteití.

Aleaí fakakulupu e ngaahi fehuí koʻeni:

- Ko e hā ha ngaahi tefitoí moʻóni ʻoku lava ke tau ako mei he ngaahi meʻa ni ʻe tokoni ke tau katekina lelei ange ai e fakafepakí?
- Ko e hā ʻoku mahuínga ai ke tau takitaha muimui ki he sippinga ʻa e Fakamoʻuí he taimi ʻo e faingataʻa pe fakafepakí? Ko e hā ne hoko ʻi he fakatokelau ʻo Mīsuli koeʻuhí ko e ʻikai ke fai ʻe ha nīhi ʻo e Kāingalotú e meʻa ni?
- Ko e fē ha taimi naʻá ke sio ai ki hano tākiena ʻe ha lea pe ngāue ʻa ha taha ha taha kehe ke ne vakai lelei ange ki he Siasí?

